

# Il vent ha midà direcziun

■ (anr/ac) La dumonda da Daniel Albertin (pcd Alvagnia) concernent la finanziaziun dals parcs da la natira en il chantun Grischun ha sveglià ier blera simpatia per quels parcs entaifer il cussegl grond. Avant paucs onns era la bainvulientscha vers ils parcs anc main derasada en il cussegl. Il deputà *Christoph Jaag* (ps Aschera) è stà surstà da la critica da las organisaziuns da l'ambient vers ils parcs grischuns che sajan, tenor las organisaziun per la protecziun da l'ambient, drizzads memia fitg ad interess economics enstagl a favur da la natira. Avant paucs onns, uschia Christoph Jaag, vegnevia accentuà critica sulet pervia da la mancanza da perspectivias economicas e plivalur. «La discussiun actuala mussa ch'ils parcs en equilibrads e sin buna via». Il motiv da la discussiun en il cussegl grond è stada la dumonda dad *Daniel Albertin* (pcs Alvagni) davart la finanziaziun dals parcs inoltrada en la sessiun dal december passà. Cussegliaer guvernativ *Martin Jäger* ha prì posiziun ier sin quella damonda e fatg valair che la finanziaziun saja segirada enfin l'onn 2018. I saja chausa dal cussegl grond da discutir e decider la summa ch'el veglia metter a disposiziun per ils parcs entaifer il tractament dal preventiv. Il cussegliaer guvernativ e minister dals parcs en il chantun Grischun ha avertì da cumparegliar las summas a disposiziun als parcs da la natira dals singuls chantuns. Il chantun Grischun mettia a disposiziun 1,06 milliuns francs l'onn a ses parcs Ela, Beverin, Adula, Biosfera Val Müstair ed Arena tectonica Sardona. Quai saja bain la pli gronda summa en paregliaziun cun ils chantuns Berna e Valais, dentant la pli pintga summa per parc. Ils ulteriurs chantuns nun hajan tants parcs sco il Grischun, ha Martin Jäger puntuà. La maioritad dals votums curdads en il cussegl grond pertutgant la damonda Albertin ha accentuà la valor dals parcs per il turissem da stad.